

# Beijfwen Ciengq Daengz Guengjdoeng Bae

□ Cinz Siengzcouh / 覃祥周

Song Guengj couh dwg beixnuengx caen,  
Song duz gaeqgim haen 'oo;  
Ngoenzneix doengz daiz daeuj ciengq go,  
Bya youz bae coh ndaw daemz gvangq.

Seizcin sam nyied vunz simsangj,  
Bak va hailangh roeg heuh rwenz;  
Gou iu gak dieg gyoengq canghfwen,  
Ciengq go sing rwenz daeuj Sahlangz.

Gou dwg duzrwi haeuj suenva,  
Gou dwg duzbya haeuj dah gvangq;  
Daeuj daengz Sahlangz caen cix angq,  
Coenz vah mbouj gangj sim gag rwenz.

Raemxdah Cuhgyangh caen ndei cim,  
Gyanghaet lae gim haemh lae ngaenz;  
Bya raemx doxrangh caen cix baenz,  
Song Guengj miz saem daeuj doxlien.

Beixnuengx doxgyaez caez diuq foux,  
Doengzcaez coux daeuj ngoenz ndit rongh;  
Song Guengj gaem fwngz mbouj hawj cuengq,  
Beijfwen yaek ciengq cien fanh nienz.

Lwglan Mbanjcuengh gyaez ciengq go,  
Minzczu doxgiet va rim bya;  
Ngoenzngoenz cungj youq ndaw fwen gvaq,  
Cien vunz aj bak fanh vunz riengz.

Cienzswnj minzczu gij vwnzva,  
Hajcib roek cuz doengz guh mwn;  
Guengjdoeng Guengjsae fwngz gaem fwngz,  
Gwnzbiengz cungj hai va youxngeih.

Raemxdah Cuhgyangh yiengq baihdoeng,  
Vareux hai mboeng coh daengngoenz;  
Vunzlai riengz dangj byaij diuz roen,  
Moqnaj ndwenngoenz ndei fanh daih.

Beijfwen ciengq liux geijcib bi,  
Sim oq lumj fiz ndei raixcaix;  
Angq ciengq Dangj raeuz Ngeihcib Daih,  
Seiq fueng bet baih daeuj doxcomz.

Sahlangz byaraemx caen ndei lah,  
Duzrwi mbungqmbaj mbin daeuj cunz;  
Gizneix beijfwen sing dekswenz,  
Bouxhek daeuj cunz mbouj siengj dauq.

Hwnzloq Cungguk gaiq bouxminz,  
Lajmbanj ndawsingz siengj doxdoengz;  
Yiengq gij muzbyauh bae yungh goeng,  
Loqsiengj miz ngoenz baenz dahraix.

Gimge funghvuengz mbin gvaq banz,  
Daeuj daengz Sahlangz hab baengzyoux;  
Sam nyied cosam dienheiq raeuj,  
Raeuz caez doengz daeuj guh beijfwen.

Lajmbwn gingj ndei youq Sahlangz,  
Beixnuengx aeu gvangq hek gyaez daeuj;  
Ma daengz gizneix gwn cenj laeuj,  
Sam bi dauq daeuj bak lij hom.

Ngoenzneix gyoengqraez daeuj doxcueng,  
Gimge funghvuengz mbin guhdoi;  
Seiq fueng beixnuengx daeuj doxboiq,  
Ciuhvunz guhdoi rongh angjdangx.

Mbwn dem ndwenngoenz vunz dem gyaeu,  
Youh daengz cincou loh raezrangh;  
Ngoenzneix doxbungz youq Sahlangz,  
Sim'angq yangzyangz beijfwen gok.

Goreux hai va dujduj hoengh,  
Beixnuengx ciengq go sim ceiq sangj;  
Angq ciengq hungmbwk gungcanjdangj,  
Angq ciengq fu'gyangz Cungguk moq.

Ndae gwn dangzrwi angq duzrwi,  
Ndae gwn haeux ndei angq bouxdaem;  
Singz mbanj bienq yiengh caengz dem caengz,  
Yaek geiq aen dangj coq ndawsim.

Ndaw ranz miz haeux ndaej ciengx gaeq,  
Ndaw dah raemx lae ndaej ciengx bya;  
Guengjdoeng ginghci mbin baenaj,  
Ndawsingz lajmbanj cungj ndei caez.

Seizcin sam nyied va hai rang,  
Ingj dwk Sahlangz hoengz muenx deih;  
Lajmbanj hwngvuengh gingjsaek maeq,  
Ranzmbanj gyaeu beij aen diendangz.

Byaraemx hamz cingz va hamz riu,  
Roeglaej roegciu daeuj doengz raez;  
Gyoengqdou geij boux nuengx Guengjsae,  
Hawj sou daegbeix siuq aenbau.

Ngoenzneix raen beix miz gyaeqhoengz,  
Hawj dou gyoengq nuengx da hix cuengq;  
Dou aeu lwgdomq caeuq mwngz vuenh,  
Doengz bae cuenh haw Sam Nyied Sam.

Guh beijfwen le giet baengzyoux,  
Bouxbox ciengq daeuj riubahnnyex;  
Nuengx dwg Guengjsae Liuz Sanhcej,  
Ngoenzneix daeuj nyex beix Guengjdoeng.

Sam nyied vadauz hai rim bya,  
Va miz geijlai cingz geij laeg;  
Guengjsae Sanhcej cingzngaih naek,  
Ndaekdomq bau hawj mbauq Sahlangz.

Sam nyied cosam sing fwen lai,  
Seiq fueng bet baih vunz caez maez;  
Beixnuengx Guengjdoeng caeuq Guengjsae,  
Yungh fwen dap ndei giuz youxngeih.

Gizneix vareux bibi sanq,  
Gizneix makganx bibi diemz;  
Gizneix beijfwen bibi ciengq,  
Beixnuengx doxriengz bibi daeuj.

Ciengq ndaej ndei le ciengq ndaej gvai,  
Ciengq ndaej va hai yinx mbungqmbaj;  
Cietgo sam nyied caen siuqsaj,  
Bimoq binaj caiq daeuj cunz.

(2 sat)

